

Date – 23/10/2024

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. **Larsap Dr. Hari Babu Kambhampatian ramchhung inpumkhatna leh hnam ziarang inhriatpawhtawwna leh chawilarna 'Bharat Ko Jano' campaign chu tun aia zau zawka kalpui a ngai a ti.**
2. **Chief Minister Pu Lalduhoma'n sorkar laipuia Minister te hmu in Mizoram chhunga National Highway kawngpui hmasawwna tur hrang hrang an sawi ho.**
3. **Tuialhthei man sang duh loh lantir nana Mizoram Commercial Vehicle Union (MCVU) hnuaia lirthei hrang hrang te vawiin khan dingin, tlai dar 4 ah tihtawp a ni.**
4. **Prime Minister Narendra Modia chuan BRICS ramte chu firfiaka chetna leh sum hmanga puihna do turin inpumkhat leh thawhhona tha nena thawk turin a sawm.**

<><><>

### BHARAT KO JANNO

Larsap Dr. Hari Babu Kambhampati chuan India rama hnam hrang hrangte inpumkhatna leh hnam ziarang inhriatpawhtawwna leh chawilarna 'Bharat Ko Jano' campaign chu tun aia zau zawka kalpui a nih theih nan theihtawp chhuah a ngai a ni a ti.

Vawiina North East Zone Cultural Centre (NEZCC), Dimapur, leh Art & Culture Department, Mizoram tangkawp buatsaiha Bharat Ko Jano programme Vairengte Jt. YMA Playground-a a hmanpuinaah he thu hi a sawi a. Larsap chuan Nagaland Governor Pu La. Ganesan, NEZCC Chairman ni bawk hmalaknaa Mizoram luhka khaw pawimawh tak Vairengtea Bharat Ko Jano program hman a ni chu lawmawm a tih thu a sawi a. Ramri dep Vairengtea chengte chu remna leh muanna vawnnun kawnga mawhphurhna pawimawh tak nei an nih thu sawiin, muanna, rinawmna leh mikhual chunga that chhuah kawnga Mizoram dinhmun chawinungtute an ni, a ti a. Program hlawhtlinna tura theihtawp chhuahtu NEZCC, Art & Culture Department, District Administration leh Mizoram, Assam, Tripura leh Bihar atanga lokal lamthiamte fakawm a tih thu a sawi a ni.

Nagaland Governor Pu La. Ganesan pawhin thu sawiin thawhhona thain inlungualna, theihna nasat zia leh hnam ziarang hausakna a pholan thu a sawi a. North East India chu India tana chetlak vel nana hmun pawimawh tak a nih

bakah India ram hnam ziarang hrang hrang awmna leh India chanchina thil pawimawh tam tak thlenna leh awmna hmun a ni, a ti.

Bharat Ko Jano Programme-ah hian Mizoram, Assam, Tripura leh Bihar atangin lamthiamte'n hnam lam chi hrang hrang an entir a ni.

<><><>

CM

Chief Minister Pu Lalduhoma'n vawiin khan Sawrkar laipua Union Minister of Road Transport & Highways hmu in Nitin Gadkari Mizoram chhunga National Highway kawngpui hmasawna tur hrang hrang an sawi dun.

An inkawmna ah hian Mizoram chhunga National Highway hrangshrang 24 awm mek chungchang ngaihtuah niin National Highway kilometre 572-a sei chuan hmasawna lian tak a thlen theihna tur leh kawngpui bula cheng ten eizawna tha tak an hmuh theih nan hmalakna tur hrang hrang sawiho niin inkalpawhna kawng tha chuan state chhungah a tha zawnga danglamna a thlen theih nan leh mi tin te hmasawna a thlen theih dan tur sawi a ni bawk.

Inkawmna ah hian Mizoram atangin Chief Secretary Dr Renu Sharma leh Mizoram sawrkara mi pawimawhten an tawiawm a ni.

Chief Minister hian vawiin vek khan Union Commerce & Industries Minister Piyush Goyal hmuin ramdang te nena insumdawn tawna leh hmarchhak bial in a chhawr tangkai tur hmasawna hrang hrang an sawi dun a ni.

<><><>

CM ON ASSAM RIFLES

Chief Minister Pu Lalduhoma'n nizan khan New Delhi ah Assam Rifles Director General Vikas Lakhera hmu in Mizorama venhimna chungchanga hmalakna tur hrang hrang an sawi dun.

Chief Minister hi sawrkar laipua thuneitu hrang hrang hmu turin nimin piah khan New Delhi a pan a, Assam Rifles hotu Vikas Lakhera nena an inkawmna ah hian tunhnaia P&E Minister Pu F. Rodinglana leh Assam Rifles checkpoint duty inkara thil thleng chungchang an sawi dun tura ngaih a ni a, Home Minister Pu K. Sapdanga sawi danin Chief Minister Pu Lalduhoma Delhi zin hian Assam Rifles Director General Vikas Lakhera nen an inkawm hunah P&E Minister Pu F. Rodinglana leh Assam Rifles chungchang an sawi dawn a ni.

Assam Rifles leh P&E Minister chungchang hi thawhtanni khan Home Minister Pu K Sapdanga hovin sawiho a ni a, Pu F Rodinglana chunga thil thleng chu an dem tih sawiin hetiang hi thleng nawn tawh lo se an duh tih sawiin an sawihonaah hian Pu F Rodinglana leh Minister dangte an tel a ni.

<><><>

MCVU PROTEST

Kawng chhia leh tuialhthei man sang avanga lungawilohna lantir nana tukin dar 6 atanga Sumdawng lirthei neitute intelkhawm Mizoram Commercial Vehicle Union (MCVU) huaihawta an lirthei hrang hrang an din tir chu vawiin tlai dar 4 khan tihtawp a ni.

MCVU hruaitute chuan Akashvani zawhna chhangin vawiina lungawilohna an lantir chu hlawhtling thawkhata an inhriat thu an sawi a. An pawl President Pu PC Malsawma sawi danin, tuialhthei man tihhniam an nawr chhan chu khawvel kalphungah tuialhthei man a toin lirthei chuan man leh hman man a to nghal zel a, chu chu mipuiin an tuar nghal zel a ni an ti a. Mizoram sorkarin tuialhthei man an tihsan chu tawlh ve hret se, lirthei chuan leh hman man tih to a ngai lo ang a, mipuiin an tuar lo thei ang tih ngaihtuahna nena lungawilohna chu lantir an nih thu an sawi a ni.

Vawiina MCVU lungawilohna lantir avang hian bus chuang thin school naupang school pan tur eng emaw zatin sorkar bus tlan lohna kawngah chuan harsatna an tawk a. Transport department bus tlanna kawngah pawh bus a chuan tum tam takin nidang aiin bus an chang rei tih an sawi a ni.

Vawiina sumdawng lirthei thenkhat an tlan loh avang hian khawpui chhunga kawngpui a thawl pah lutuk lo niin Traffic Police Duty ten kan corr an hrilh a, Two-wheeler taxi leh taxi te an vaia sorkarin a tlantir vang a nih an rin thu an sawi a ni. Two-wheeler taxi driver leh taxi driver te chuan nidang aia tlanna a tam pah chuan loh thu an sawi bawk a ni.

Vawiina sumdawng lirthei nuar tur avang hian mipuite harsatna sutkian nan sorkar chuan MST Bus 14 khawpui chhungah a tlantir a. Zing dar 7:30 atanga tlai dar 5 thleng khan sorkar bus te hi an tlan a ni.

Puan tawh angin, MCVU hmalakna hi Mizoram Taxi Association leh Aizawl Two-wheeler Taxi Association in an thlawp ve lo a. Mizoram Taxi Association President Pu Caleb Ralte chuan MCVU te an thlawp ve loh chhan chu MCVU member an nih loh vang leh mipuite harsatna siam zawnga lungawilohna lantir an duh loh vang a nih thu Akashvani an hrilh a.

Khawpui mai ni lo, thingtlang lam thlengin nitin eichawp zawng, damdawiin kal ngai leh midangten an tawrh tur an ngaihtuahin tha an tih loh thu an sawi.

Aizawl Two-wheeler Taxi Association pawhin vawiina MCVU huaihawt lungawilohna lantirna chu member tam zawkin an duh loh avanga thlawp lo an nih thu Akashvani an hrilh a. Two Wheeler Media publicity Secy Pu Lalremkima chuan Committee angin MCVU hnenah an thlawp thu an sawi hmasa zet na a committee in an member te ngaihdan an laka midang lirthei khalh tam tak an awm thu leh chhungkaw chawm an nih mek te bakah harsatna hrang hrang an sawi avangin member tam zawk duhdana kalin an thlawp leh ta lo tih an sawi ni.

<><><>

## PM-BRICS

Prime Minister Narendra Modia chuan BRICS ramte chu firfiaka chetna leh sum hmanga puihna do turin inpumkhat leh thawhhona tha nena thawk turin a sawm. Vawiina BRICS Summit vawi 16-na Kazan-a neihah he thu hi sawiin Pu Modia chuan hmai thinghawng vuah chunga firfiak do thin an awm chu a demawm a tih thu sawiin thalaite zinga firfiaka chetna hluar chho mek chu ven a ngai a ni a ti a. UN-a firfiakte dona tur ruahmanna Comprehensive Convention on International Terrorism chu a taka tihlawhtlin a hun tawh thu a sawi bawk a ni.

Hei bakah hian Pu Modia chuan cyber security atan khawvel huap dan tha tak neih a tul thu sawiin AI him leh tha taka hman dan ngaihtuah a ngai a ti bawk.

<><><>